

En regurdientscha dil giuven defunct

20.5.80

Gion Andriu Berther, Camischolas

Vegnas oz ni forsa damaun
mort – cun tiu crudeivel maun ?
Spetgas forsa gnanc in'ura
che ins rauassi ni lavura.

(Corr.) Ina buna mort anetga sa esser per il pertuccau liberaziun e comiau da quest mund glienadi. Mo per ils restonts anavos eisi ina frida dolorusa e buca da capir. Quei ei stau la sort dil defunct, al qual nus dedichein quellas duas lingias da regurdientscha. Sin siu davos viadi ord baselgia da Sedrun a casa encounter Camischolas ha la freida mort suati el e terminau sia cuorsa terresta. Eis ei buca sco sche perfin la mort fuss en nies temps da prescha e gnarvusadad darentada pli maligna ed aggressiva? Cons cass da mort anetga dat ei – senza tener quen dils accidents mortals sin via!

Ei va buca tgunsch da scriver in necrolog per in um els megliers onns. Aschia s'annunzia quella maiestad pussenta puspei ils 2 da matg 1980 tier nies bien Gion Andriu Berther a Camischolas. Gion Andriu ei naschius en quella biala ucliva ils 2 da matg 1938. E per raritad, gest il di da sia mort havess el cumpleniu siu 42avel onn da naschientscha. Bein ina curiositat! El era il secund affon da 5 fargliuns dad Ulrich e Nescha Berther, nata Monn. Niessegner haveva dau a quei affon ina via dalla crusch. Il defunct piarda sia pli carezada mumma gia cun strusch 4 onns. La mumma ei morta entras la naschientscha d'in affon ed ha priu cun ella quei pign a unghielet enta parvis. Ins sa buca s'imaginar il mal che quels quater orfans han sentiu da sperder lur custeivel scazi: lur carezada mumma! In mal che ha fatg rassisch el cor a quels paupers affonets senza mumma. In cletg sco mo paucs han la cuida d'haver sin quest mund ei che lur onda Maria ei semessa ensemen cun siu frar e vieu Ulrich e fatg entochen che tuts ein stai carschi ina buna mumma a quels pigns. La paga-



glia persuenter vegn in di ad esser gronda.

Gia ils anno 1971 piardan ei lur carezau bab e quei d'ina mort anetga sper casa a Camischolas. Bein fridas che fan mal. Tgei far ussa? Il trapassau ei cheu persuls culla buna onda Maria e lezza gia sils onns –. Ei vendan giu il muvel, malgrad che el haveva giu frequentau a sias uras ina buna scolazion purila, e quei a Baar el cantun Zug. Il Gion Andriu lavura empau tscheu ed empau leu. El senteva il mal d'ina malsogna maligna che ha plaut a plaut sdrenau quella plonta entochen a sia mort anetga. In malesser che mudregia e lai negin ruaus, ni di ni notg. Mo las vias dil Segner ein buca las nossas, e tut quei che lez ordeina ei segiramein per nies bien. Aschia plaida gie nossa cardientscha.

Car Gion Andriu, Ti has ussa finiu cun Tes mals terresters e sas selegrar enta parvis sper Tia pli carezada mumma e Tiu bab. Roga era per nus tutt cheu, aunc viandonts encounter la patria celestials. Pertgei era nus savein buca cura che nossa ura arriva per il cumiau da quest mund. A Tes cars fargliuns e parents nossa pli sincera condolentscha ed als morts il ruaus perpeten. G.F.